

Ho Tloha Seboping ho ea Tlung ea Borena



SABATHA MANTSIBOEA

Bakeng sa Boithuto ba Beke Ena Bala:

Daniele 3, Tšen. 13:11–18, Exod. 20:3–6, Deut. 6:4, 1 Ba-Kor. 15:12–26, Ba-Heberu 11.

Teman'a Khopolo:

“Molimo oa rona oo re o sebeletsang, o na le matla a ho re lokolla seboping sa mollo o bohale, ‘me o feela o tla re lokolla letsohong la hao, morena”(*Daniele 3:17*).

Ka mokhoa o joalo, bacha bana ba tletseng ka Moea o Halalelang, ba phatlaetsa sechaba sohle tumelo ea bona, hore eo ba mo rapelang ke eena Molimo o phelang oa ‘nete a ‘notši. Pontšo ena ea tumelo ea bona e bile sesupo se bokheleke ka ho fetisisa sa seo ba se lumetseng. E le ho toboketsa likelellong tsa ba khumamelang litšoantšo, matla le boholo ba Molimo o phelang, bahlanka ba Hae ba lokela ho senola hlomphe eo ba nang le eona ho Molimo. Ba lokela ho totobatsa hore ke eena feela ea lokeloang ke hlomphe ea bona le khumamelo, ‘me le hore ha ho le monahano, leha e le oa ho pholosa bophelo ka bo bona, o ka ba tlisetsang maikutlo a ho khumamela litšoantšo. Lithuto tsena li ameha ka tsela e otlohileng ea bohlokoa le boiphihlelo ba rona matsatsing a ho qetela.” — Ellen G. White, *In Heavenly Places*, leq. 149. Leha ho tobana le litšoso tsa lefu ka lebaka la taba ea borapeli e ka bonahala e le taba ea pele ho mahlale le mengoaheng ea botumela-khoela, Lengolo le bontša hore qetellong ea nako, ha lefatše le “hatetse pele” haholo, ho tla etsahala se tšoanang, empa e le ka tsela e akaretsang lefatše. Ka hoo, boithutong ba pale ena, re bona lehlaselani la litaba tseo ho latela Lengolo, ba tšepelang ba Molimo ba tla tobana le tsona.

**Ithute thuto ea beke ena ho lokisetsa Sabatha sa la 25 Pherekhong.*

Setšoantšo sa Khauta

Bala Daniele 3:1–7. Ke eng seo e ka bang se susumelitse morena ho etsa setšoantšo see?

Ho fetile lilemo tse ka bang mashome a mabeli lipakeng tsa toro le khaho ea setšoantšo. Leha ho le joalo, ho bonahala e ka morena ha a sa lebala toro le hore Babilona e ea timela ‘me e nkeloe sebaka ke mebuso e meng. Ka ho se khotsofatsoe ke ho ba hlooho ea khauta feela, morena o batla ho emeloa ke setšoantšo sohle e le ho fetisa molaetsa ho babusuo a ba hae hore ‘muso oa hae o tla ba teng boleleleng ba nalane.

Boitšoaro bona ba boikhohomoso bo re hopotsa ba lihahi tsa Tora ea Babele, bao, boikakasong ba bona, ba etsang teko ea ho qholotsa Molimo ka sebele sa Hae. Nebukadnesare o boikakaso bo tšoanang mona. O fihletse tse ngata e le ‘musi oa Babilona, joale o sitoa ho phela le mohopolo oa hore ‘muso oa hae o tla feta. Ka hoo, tekong ea hae ea ho iphahamisa, o etsa setšoantšo ho phahamisa matla a hae ‘me kahona a leke botšepahi ba bafo ba hae. Leha ho sa hlaka hore na setšoantšo se ne se reretsoe ho emela eena kapa molingoana, re lokela ho hopola hore mehlang ea khale meeli ea lipolotiki le borapeli e ne atisa ho ba lerotho, haeba e ne e le teng le hona.

Hape re lokela ho hopola hore Nebukadnesare o bile le menyetla e ‘meli ea ho tseba Molimo. Oa pele, o leka bahlankana ba ba-Heberu o fumana ba le bohlale ha leshome ho feta bahlankana ba Babilona. Eaba, kamorao ho hore ba bohlale bohle ba hlolehe ho mo hopotsa toro ea hae, Daniele o mo tlahela mehopolo ea kelello ea hae, toro, le manollo ea eona. Qetellong, morena o ananela borena ba Molimo oa Daniele. Empa ho makatsang, lithuto tsena tse fetileng ha li bonahale li thibela Nebukadnesare ho khutlela borapeling ba litšoantšo. Hobaneng? Taba e haufi e ka ba boikhohomoso. Batho ba hana ho amohela hore likatleho tsa bona tsa maruo le kelello ke lefeela ‘me li tla fela li timele. Ka nako tse ling re ka itšoara joalo ka “bo Nebukadnesare” ba banyane ha re bea likelello tsa rona haholo likatlehong e be re lebala na e ka ba lefeela ha kae ha li bapisoa le bosafeleng.

Re ka ithuta joang hore re se ke ra oa, leha e ka ba ka litsela tse masene, lemeneng leo Nebukadnesare a oelang ho lona?

Pitso ea Khumamelo

Bala Daniele 3:8–15 le Tšenolo 13:11–18. Re bona eng e tšoanang mahareng a se etsahalang nakong ea Daniele le se tla etsahala kamoso?

Setšoantšo sa khauta se emeng lehoatateng la Dura, le lebitso la lona ka puoa ea Akkadian le bolelang “sebaka se kampetsoeng ka lerako,” se fa sebaka seo se kampetsoeng ka lerako chebahalo ea sehalalelo. Joalo kaha e ka ha ho oa lekana, sebupi se haufi se tlisa kelellong mohopolo oa aletare. ‘Mino oa Babilona e ba karolo ea tšebeletso ena ea khumamelo. Ho thathamisitsoe mefuta e supileng ea liletsoa, joalo kaha e ka ho akanyoa botlalo le katleho ea tlhophiseho ea khumamelo.

Kajeno, re khothaletsoa ka mahohle ho amohela mekhoha e mecha ea bophelo le mehopolo, le ho lahla boinehelo ba rona ho Molimo joalo kaha ho ngoliloe Lentsoeng la Hae ‘me re neelane ka botšepahi ba rona ho balateli ba mehleng ea joale ba ‘muso oa Babilona. Khoheli ea lefatše ka linako tse ling e matla a hlolang, empa re lokela ho ikhopotsa hore botšepahi ba ronabo ho Molimo eo e leng ‘Mopi.

Ho latela alemanaka ea boprofeta, re phela nakong ea ho qetela ea nalane ea lefatše. Tšenolo 13 e phatlalatsa hore bohle ba ahileng lefatšeng ba tla laeloa ho khumamela setšoantšo sa sebata. Boemo boo bo tla etsa hore “bohle ba banyane le ba baholo, ba ruileng le ba fumanehileng, ba sa ruuoang le ba ruiloeng, ba amohela letšoao letsohong le letona la bona, leha e le phatleng tsa bona” (Tšen. 13:16).

Mekhahlelo e tšeletseng ea batho e boleloa e khumamela sebata: “ba banyane le ba baholo, ba ruileng le ba sa ruang, ba ruoeng le ba sa ruoang.” Palo ea sebata, e leng 666, le eona e tiisa tšelela. Sena se bontša hore setšoantšo seo Nebukadnesare a neng a se entse ke sesupo sa seo Babilona ea mehleng ea bofelo e tla se etsa matsatsing a ho qetela (sheba Dan. 3:1 bakeng sa karaburetso ea tšelela le mashome a tšeletseng). Kahona, re etsa hantle ho ela hloko se etsahalang ketsahalang ena le kamoo Molimo ka borena ba Hae a laolang liketsahalo tsa lefatše.

Khumamelo ha se feela ho khumama kapele ho ntho kapa motho e mong e be u phatlalatsa bolateli ba hau Litsela tse ling ke li fe, tse neakaneng haholo, tseo ka tsona re ka qetellang re khumamela ho hong hosele ho Morena oa rona?

Teko ea Mollo

Ho Ba-Heberu ba bararo, khumamelo ea setšoantšo e qobelloang ke morena ke mokoebe oa khumamelo ea tempele e Jerusalema, eo ba bileng le boiphihlelo ba eona lilemong tsa bongoana ba bona. Leha ba tsoere liofisi tsa ‘muso ebile ba tšepahalla morena, botšepahi ho Molimo bo sea meeli ea botšepahi ho motho. Ka ho hlaka ba ntse ba na le thahasello ea ho sebeletsa morena e le batsamaisi ba tšepelang; leha ho le joalo, ha ba ka ke ba kena tšebeletsong ena.

Bala Exoda 20:3–6 le Deuteronoma 6:4. Litemana tsee li hlalisa eng eo kannete-nete e bileng tšusumetso ea boemo boo ba bileng ba bo nka?

Batho bohle ba latela litaelo tse fanoeng ke morena, ‘me ha ba utloa melumo ea liletsoa tsa ‘mino ba khumamela setšoantšo sa khauta. Ke ba bararo feela—Shadrake, Meshake, le Abednego—ba nang le sebete sa ho se mamele morena. Hang-hang, ba-Babilona ba bang ba tsebisa morena taba ena. Banqosi bana ba leka ho halefisa morena ka hore: (1) ke morena ka sebele sa hae a beileng bahlankana bana ba bararo taolong ea setereke sa Babilona; (2) banna bana ba ba-Juda ha ba sebeletse melimo ea morena; hape (3) ha ba khumamele setšoantšo sa khauta seo morena a se emisitseng (Dan. 3:12). Empa le har’a khalefo ea hae ho bona, morena o fa banna bana ba bararo monyetla oa bobeli. Morena o ikemiselitse ho pheta tšebeletso ena hape e le hore banna bana ba fetole boemo ba bona ‘me ba khumamele setšoantšo. Haeba ba ka hana ba tla lahleloa kahare ho sebopi sa mollo. Ebile Nebukadnesare o qetella boipiletso ba hae ka polelo ea boikakaso: “‘me molimo ke ofe o tlang ho le lokolla letsohong la ka?” (Dan. 3:15).

Ka hobane ba ne ba neiloe sebete se kaholimo ho sa motho, ba arabela morena: “Bona, Molimo oa rona, oo re o sebeletsang, o na le matla a ho re lokolla seboping sa mollo o bohale, ‘me o tla fela o re lokolla letsohong la hao, morena. Leha ho se joalo, u tsebe morena, hobane re ke ke ra sebeletsa melimo ea hao, re ke ke ra khumamela setšoantšo sa khauta seo u se emisitseng” (Dan. 3:17, 18).

Leha ba tseba hoba Molimo oa bona o tla ba lokolla, ha ba na tiisetso ea hore o tla feela o etse joalo. Leha ho l ejoalo, ba hana ho latela taelo ea morena, leha ba tseba hore ba ka ‘na ba chesoa ba ntse ba phela. Tumelo ea mofuta oo re e nka kae?

Monna oa Bone

Bala Daniele 3:19–27. Ho etsahala eng? Ke mang motho e mong ea kahar’a mollo?

Ha a se a akhetse ba-Heberu ba tšepelang kahar’a mollo, Nebukadnesare o makatsoa ke ho bona boteng ba motho oa bone kahare ho sebopi. Tsebong ea hae, morena o hloaea motho oa bone e le “mora oa Molimo” (Dan. 3:25).

Morena o sitoa o sitoa ho bua ho feta moo, empa rea tseba hoba motho oa bone ke mang. O hlaha kapele ho Abrahama pele ho tšenyeho ea Sodoma le Gommora, o loana le Jakobo pela seliba sa Jabboke, hape o itlhamisa ho Moshe sehlahleng se tukang empa e sa che. Ke Jesu Kreste boemong ba pele a e-ba nameng, a tla ho bontša hore Molimo o ema le batho ba Hae mahlomoleng a bona.

Ellen G. White o re, “Empa Morena ha a ka a lebala bao e leng ba Hae. Ha lipaki tsa Hae li lahleloa kahare ho sebopi, Mopholosi a itlhamisa ka sebele sa Hae, ‘me ba tsamaea har’a mollo hammoho. Boteng ba Morena oa mocheso le serame, malakabe a lahlehelo a ke matla a oona a ho chesa.”—*Prophets and Kings*, maq. 508, 509.

Joalo kaha Esaia a bolela, “‘Ha u tšela har’a metsi, ke tla ba le uena; ha u tšela linoka, li ke ke tsa u nka: leha u feta har’a mollo, u ke ke oa cha, le malakabe a ke ke a u tlabala’” (Esa. 43:2).

Leha re rata lipale tse kang ena, li tlisa lipotso ka ba bang ba sa kang ba lokolloa ka mohlolo ha ba ne ba hlorisetsoa tumelo ea bona. Banna bao ba tlameha ba tseba boiphihlelo ba Esaia le Sakaria hantle, ba bolaoang ke marena a khopo. Hohle kahare ho nalane e halalelang, ho isa mehleng ea rona, Bakreste ba tšepelang ba fetile har’a tlhokofatso e felletseng ho bona, bonyane mona, e seng ka topollo ea mohlolo empa ka lefu le bohloko. Ena ke ketsahalo e ‘ngoe eo ba tšepelang ba fumanang topollo ea mohlolo empa, joalo kaha re tseba, lintho tse joalo ha li etsahale kamehla.

Ka hlakoreng le leng, ke topollo e fe e mohlolo eo bohle ba tšepelang ba Molimo ba tla e neoa, ho sa natse pheletso ea bona moo?(Sheba 1 Ba-Kor. 15:12–26.)

Lekunutu la Tumelo e Joalo

Ha re nahana ka boiphihlelo ba Shadrake, Meshake, le Abednego, re ka ipotsa: lekunutu la tumelo e matla ha kaalo ke le fe? Ke joang ba neng ba ikemiselitse ho ea cha ba ntse ba phela ho na le ho khumamela setšoantšo? Nahana ka litsela tsohle tseo ba ne ba ka beha mabaka a ho latela litaelo tsa morena. Feela, ho sa natse hore e be ba hlokometse hore ba ka be ba shoel, joalo ka ba bang ba bangata, empa ba ema ba tiile.

Bala Ba-Heberu 11. E re ruta eng ka seo tumelo e leng sona?

E le hore re tle re be le tumelo e joalo, re lokela ho utloisisa eo tumelo e leng sona. Ba bang ba na le chalimo ea lipalo ea tumelo; ba kala tumelo ka bongata ba likarabo tseo ho bonahalang ba li fumane ho Molimo. Ba ea setsing sa khoebo e be ba rapella ho fumana moo ba tla paka koloi. Haeba ba ka fumana sebaka ha ba fihla, ba etsa qeto ea hore ba na le tumelo e matla. Haeba libaka kaofela li tletse, ba lekanya hoba mohlomong ha ba na tumelo e matla ho lekana hore Molimo a mamele lithapelo tsa bona. Kutloisiso ena ea tumelo e ka ba kotsi hobane e leka ho sotha Molimo letsoho ‘me ha e re letho ka borena ba Molimo le bohlae ba Hae.

Efela, tumelo ea ‘nete, joalo kaha e bonahalitsoe ke metsoalle ea Daniele, e kaloa ka boleng ba kamano ea rona le Molimo le tšepo e tletseng ho Molimo e tlišoang ke eona. Tumelo ea ‘nete ha e leke ho sotha thato ea Molimo hore e bape le thato ea rona; empa, e nehela thato ea rona thatong ea Molimo. Joalo kaha re bona, banna ba bararo ba ba-Heberu ha ba tsebe ka botlalo seo Molimo a ba phuthelletseng sona ha ba etsa qeto ea ho qholotsa morena ‘me ba eme ba tšepahalletse Molimo. Ba khetha ho etsa hantle ho sa natse litlamorao. Sena ke sona se hloaeang tumelo e tiileng. Re bontša tumelo ea ‘nete ha re rapela ho Morena ka seo re se batlang empa re mo tšepela hore o tla etsa se leng molemo o fetisisang bakeng sa rona, le haeba ka nako eo re sa utloisise se etsahalang le lebaka la teng.

Ke litsela li fe tseo ka tsona re ka kenyang tumelo tšebetsong letsatsi le letsatsi, le “linthong tse nyane” tse ka thusang tumelo ea rona ho hola ‘me e lokele liqholotso tse fetisang ka boholo tse tla tla kamor’a nako? Hobaneng ha, ka litsela tse ngata, litiko tse holim’a “lintho tse nyane” e le tsona tse bohlokoa ka ho fetisisa?

Ho Ithuta Haholoanyane:

“Lithuto tse lokelang ho ithutoa boiphihlelong ba bacha ba ba-Heberu lehoatateng la Dura li bohlokoa. Mehlang ena ea rona, ba bangata ba bahlanka ba Molimo, leha ba se na molato oa litlōlo, ba tla neeloa ho hlokofofatsoa ka ho tlontlolloa le tthekefetso matsohong a bao, ka tšusumetso ea Satane, ba tletsoeng ke mona le boikhohomoso ba borapeli. Ka ho khetholoha, khalefo ea motho e tla phahama khahlanong le ba bolokang Sabatha ea molao oa bone e halalela; ‘me qetellong molao o akaretsang lefatše o tla tsoa bana e le ba lokeloang ke lefu. “Nako ea mahlomola e tlang batho ba Molimo e tla hloka tumelo e ke keng ea thekesela. Bana ba Hae ba lokela ho bonahatsa hore ke Eena feela ea tšoaneloang ke khumamelo ea bona, le hore ha ho na maikutlo, le a bophelo ka bo bona, a ka ba susumetsang ho inehela borapeling ba bohata. Ho pelo e tšepelang, taelo ea batho ba baetsalibe ba shoang e fetoha lefeela papisong le lentsoe la Molimo oa bosafeleng. ‘Nete e tla lateloa leha litholoana e ka ba ho hlaleloa chankaneng kapa ho lelekoa naheng kapa lefu.”—Ellen G. White, *Prophets and Kings*, maq.512, 513.

Lipotso tsa Puisano:

1. Bala 1 Petrose 1:3–9. Hobaneng ha Molimo a lopolla ba bang a lese ba bang mahlomoleng? Kapa karabo ea lipotso tse kang ee ke eo re sa tlo e fumana hona joale? Maamong ao topollo ea mohlolo e sa etsahaleng, hobaneng ha re lokela ho tšepa molemo oa Molimo ho sa natse tšoabo eo?
2. Haeba ketsahalo ena e ne e qetelletse ka ho shoa ha banna bana ba ba-Heberu seboping sa mollo o bohale, re ka be re fumane lithuto li fe ho eona leha ho le joale?
3. Ho tsoa kutloisisong ea rona ea liketsatsahalo tsa ho matsatsi a ho qetela, sesupo se bonahalang e tla ba se fe, taba, eo eo re mo khumamelang e tla be lutse ho eona? Taba ee e lokela ho re bolella eng hona joale ka bohlokoa ba Sabatha?
4. Bala Luka 16:10. Mantsoe a Krete moo a re thusa joang ho utloisisa hantle se boleloang ke ho phela ka tumelo e le kannete?
5. Bala Daniele 3:15 hape, ha Nebukadnesare a re, “ke ofe molimo o tla le lopolla letsohong la ka?” u ne u ka arabela potso eo joang?